



SAVEZ OPĆINA I GRADOVA
FEDERACIJE BOSNE I HERCEGOVINE
Association of municipalities and cities of the FBiH

GODINA: XIII

BROJ: 226

DATUM: 09.09.2016.GODINE



Usluge Saveza

• PRAVNO SAVJETOVALIŠTE:

Selma Fišek, viši saradnik za pravna pitanja
fax: + 387 33 552 810
selma@sogfbih.ba

• FINANSIJSKO SAVJETOVALIŠTE:

Dženita Kovačević, viši saradnik za finansijska pitanja
fax: + 387 33 552 810
dzenita@sogfbih.ba

Sadržaj biltena:

Općine Stolac, Neum, Ravno i Grude u projektu IFAD 6

U Ključu implementacija projekta
Jačanje uloge mjesnih zajednica u BiH

Općina Cazin prva u BiH kada je u pitanju saradnja sa Švicarskom agencijom za razvoj

U Livnu započinje izgradnja tvornice opruga

U Novom Sarajevu prvi podzemni kontejneri na području Kantona Sarajevo

Potpisivanjem Ugovora između Grada Sarajeva i italijanske firme Leitner ozvaničen početak izgradnje Trebevičke žičare

Unioninvest ulaže 1,7 miliona KM u industrijsku zonu Binježevo

Donji Vakuf dobija zaobilaznicu

Najava obilježavanja dana općina i gradova za mjesec septembar/rujan

Bilten Saveza općina i gradova Federacije Bosne i Hercegovine

OPĆINE STOLAC, NEUM, RAVNO I GRUDE U PROJEKTU IFAD 6



U Općini Stolac je 1. septembra/rujna organizirano potpisivanje Memoranduma o razumijevanju za implementaciju IFAD projekata u općinama: Stolac, Neum, Ravno i Grude. Memorandum je ispred Ureda za koordinaciju projekta pri Federalnom Ministarstvu poljoprivrede, vodoprivrede i šumarstva potpisao direktor Halil Omanović s načelnicima općina:

Stjepanom Boškovićem, Živkom Matuškom, Andrijom Šimunovićem te Ljubom Grizeljem. Potpisivanjem memoranduma postale su četiri od 27 općina obuhvaćene projektom „Razvoj ruralnog poslovanja“ koji se odnosi na razvoj ruralne infrastrukture i pomoći poljoprivrednim proizvođačima. Cilj projekta je pružanje tehničke i finansijske pomoći poljoprivrednim proizvođačima u podizanju novih ili širenju postojećih proizvodnih kapaciteta te jačanje kapaciteta zadruga radi što kvalitetnijeg pružanja usluga članovima i kooperantima radi poboljšanja poslovanja i infrastrukturnog povezivanja što će rezultirati povećanim prihodima poljoprivrednih proizvođača. Potpisivanjem Memoranduma otvorena je prilika poljoprivrednicima za kandidiranje mikroprojekata u maksimalnoj vrijednosti do 250.000,00 KM. Ukupna sredstva planirana za financiranje šestog IFAD-ovog projekta razvoja u ruralnim sredinama za BiH iznose 33 milijuna konvertibilnih maraka od čega će 64% sredstava biti uloženo za projekte u F BiH.

U KLJUČU IMPLEMENTACIJA PROJEKTA JAČANJE ULOGE MJESNIH ZAJEDNICA U BIH

Općinu Ključ je 5. septembra/rujna posjetila delegacija Švicarske Ambasade, Švicarske razvojne korporacije i UNDP-a BiH. Posjeta je počela u Poslovnoj zoni Velagići gdje je Općinski načelnik Nedžad Zukanović sa svojim saradnicima goste upoznao o privrednim subjektima koji tu djeluju, a zatim su posjetili firmu Kofix d.o.o. i prostor na kojem je počela izgradnja nove proizvodne hale ove firme. Načelnik je također prisutne upoznao sa implementacijom projekta izgradnje vodovoda i hidrantske mreže u industrijskoj zoni, a koji je finansirao upravo SDC (Švicarski razvojni program).





Nakon toga Općini Ključ je održan radni sastanak na kojem je Gunter Joseph, direktor Švicarske razvojne korporacije u BiH koji je u odlasku upoznat novim osobljem sa svim do sada realiziranim i tekućim aktivnostima kao i planovima za budućnost, a sve u cilju nastavka izuzetno dobre saradnje sa Općinom Ključ Azra Kujundžić, Viši referent za podršku razvoju prisutnima je prezentirala do sada urađene projekte finansirane od Švicarske vlade i SDC-a, te predstavila tekuće projekte i buduće za koje očekujemo nastavak upravo sa SDC-om.

Općinski načelnik Nedžad Zuaknović je istakao da Općina Ključ ulaže sve svoje resurse i napore na jačanje i unapređenje saradnje sa SDC, Švicarskom Ambasadom i UNDP-om BiH što govori i podatak da je putem njih u prošloj godini u naš gradu loženo oko 1,4 hiljade KM. Trenutno putem ovih donatora UNDP u Ključu implementira izuzetno značajna projekta „Jačanje uloge mjesnih zajednica u BiH“ „ILDP-Integriranje lokalnog razvojnog programa“ i nastavak projekta „Dijaspore i razvoj“.

OPĆINA CAZIN PRVA U BIH KADA JE U PITANJU SARADNJA SA ŠVICARSKOM AGENCIJOM ZA RAZVOJ

Načelnik općine Cazin mr. Nermin Ogršević je 3. septembra/ rujna delegaciju Švicarske ambasade u BiH, Švicarske razvojne agencije i UNDP-a.

„Od 143 općine u BiH, mi direktno surađujemo s nekih 50 putem naših programa i u okviru tih partnerskih općina od samog početka općina Cazin je bila jedan od naših najvažnijih partnera. Jer to je općina u kojoj vlasti zaista razmišljaju o budućnosti i



onim što je dobro za njihove građane. Oni su takođe, pokazali otvorenost i spremnost za uvođenje inovacija, novih načina upravljanja i nekih stvari koje će se u budućnosti jako dobro vidjeti. Tako da je za naš odjel za saradnju Švicarske ambasade ova saradnja vrlo zanimljiva, kao i njeni kratkoročni i dugoročni rezultati koje smo postigli“, rekao je dosadašnji direktor Švicarske agencije za razvoj Gunter Joseph.

On je dodao da će Švicarska agencija za razvoj nastaviti svoje prisustvo u Cazinu kao jednoj od svojih partnerskih općina i zahvalio se načelniku Ogrševiću i njegovom timu na ovoj saradnji.

„Mi zaista imamo iza sebe historijat saradnje i puno realiziranih projekata. Za našu općinu je bitno da imamo ugled koji smo stekli kod Švicarske vlade, kao partner u realizaciji projekata. Općina smo koja završava započete poslove i pristupa im temeljito i zato nam je lako surađivati sa Švicarskom agencijom za razvoj i sa Švicarskom vladom. Zbog toga smo i dio projekta MEG u kojem je uvaženo dosta naših sugestija i prijedloga i mislim da će ova saradnja za nas biti dosta značajna u narednom periodu jer ćemo se fokusirati na ekonomski razvoj“.

U LIVNU ZAPOČINJE IZGRADNJA TVORNIČE OPRUGA

U Gospodarskoj zoni Begovača u Livnu ovih će dana započeti izgradnja tvornice- proizvodnog pogona firme B-Spring osnovane od strane grupacije Mecaspring iz Belgije. Kako je saopćeno iz Općine Livno riječ je o vodećem proizvođaču opruga u zemljama Beneluksa. Osnovna djelatnost ove firme je proizvodnja opruga i alata za sve industrije, posebno za zrakoplovnu i autoindustriju. Općinski načelnik Luka Čelan sa suradnicima razgovore s belgijskom firmom započeo je prije nešto više od godinu dana. Na sastanku održanom 7. septembra/ rujna održanom u zgradi Općine s direktorom B-Springa Franom Brajkom i vlasnikom grupacije Mecaspring Salvatoreom Baiamonteom izrazio je svoje zadovoljstvo što su svi dosadašnji pregovori dali konkretne rezultate. Na sastanku su usuglašene posljednje pripreme radnje pred sam početak izgradnje.



Grb Općine Cazin



Grb Općine Livno



"Gradit ćemo objekt od 2100 kvadrata kapaciteta za 30 uposlenih u jednoj smjeni. Vrijednost samog objekta je od dva i pol do tri milijuna konvertibilnih maraka. Također vremenom planiramo instalirati najnoviju tehnologiju. Naravno, u budućnosti smo otvoreni za dogradnju objekta i povećanje kapaciteta", kazao je u obraćanju novinarima nakon sastanka direktor B-Springa Frano Brajko i dodao: "Svim potencijalnim belgijskim i drugim investitorima prenijet ćemo naša iskustva i posvjedočiti da će im općinske službe gotovo trenutno

napraviti sve potrebne radnje kada je u pitanju potrebna papirologija." Da je ovo jedna dobra vijest za cijelu livanjsku zajednicu, pozitivna i ohrabrujuća činjenica za Livno, naglasio je u svom obraćanju novinarima načelnik Čelan. "Ovo je sigurno veliki plus za našu općinu, pogotovo u ovoj situaciji u kojoj se trenutno nalazimo, i u ovoj gospodarskoj krizi. Mogu reći da smo mi od početka naše poslovne partnere shvatili ozbiljno i sve ono što im je trebalo Općina je osigurala", kazao je načelnik. Također je naglasio da u današnje vrijeme nije lako osigurati investitora pogotovo kada se u vidu ima činjenica globalne situacije u BiH, a pogotovo situacija kad su lokalne zajednice u pitanju koje zakonski nemaju veće mogućnosti kojima bi privukle strane ulagače. "Općina, kao jedinica lokalne samouprave, nema zakonsku mogućnost sama graditi tvornice, kao što neki misle. Tim prije svaki ovakav projekt je dobro došao. Mi kao lokalna zajednica trebamo raditi na onom što možemo, a to je, prije svega, da osiguramo gospodarske zone, da pripremimo zemljište što se tiče vlasništva, imovinsko – pravnih odnosa, da nema nikakvih problema, i na taj način da stvorimo određene preduvjete za ulaganje u našu općinu. Naravno, uz to sve ide i izgradnja kvalitetne infrastrukture, na čemu smo zadnjih godina zaista puno radili, i evo sad smo u situaciji da taj posao daje konkretne rezultate i ja se samo mogu nadati da ovo neće biti jedini projekt, da ćemo ih imati još ovakvih ili sličnih projekata", kazao je načelnik Čelan istaknuvši da su u pripremi još neki projekti za koje se nada da će biti realizirani a sve to s ciljem poboljšanja životnih uvjeta, kako je rekao, svima koji žive u livanjskoj općini, kako bi ovdje pronašli posao i tu živjeli i radili.

KORISNI LINKOVI ZA PREDPRISTUPNE FONDove EU:

www.southeast-europe.net
www.adriaticipacbc.org
www.interregadriatico.it
www.europa.ba
www.cbib-eu.org
www.cbc.bih-mne.org
www.srb-bih.org
www.cbc-cro-bih.net
www.programmmed.eu
www.tacso.org
www.euroinfocentar.ba
www.balkanfund.org
www.eurelsmmed.com
www.eacea.ec.europa.eu

U NOVOM SARAJEVU PRVI PODZEMNI KONTEJNERI NA PODRUČJU KANTONA SARAJEVO

Na području općine Novo Sarajevo u ulici Trg Heroja broj 12 u srijedu, 07. septembra ove godine upriličena je zvanična primopredaja prvog eko-otoka u Bosni i Hercegovini sa četiri podzemna kontejnera.

Svečanoj primopredaji prisustvovali su premijer Kantona Sarajevo **Elmedin Konaković**, načelnik Općine Novo Sarajevo **Nedžad Koldžo**, ministar komunalne privrede i infrastrukture KS **Senad Hasanspahić**, ministar prostornog uređenja, građenja i zaštite okoliša KS **Čedomir Lukić**, ambasador Republike Češke u Sarajevu **Jakub Skalník**, direktor KJKP „Rad“ **Selim Babić** i direktorica Ekopaka **Amela Hrbat**.



Navedeni radovi realizirani su u okviru implementacije pilot projekta „Razvoj sistema primarne selekcije ambalažnog otpada iz komunalnog čvrstog otpada u Kantonu Sarajevo“, kojeg Općina Novo Sarajevo realizira u saradnji sa Ministarstvom komunalne privrede i infrastrukture Kantona Sarajevo i KJKP „RAD“.



Grb Općine Novo Sarajevo



Premijer KS Elmedin Konaković u svom obraćanju istakao je kako će ovaj novi koncept prikupljanja otpada biti trend u narednih nekoliko godina.

Nadamo se da ćemo uskoro zamijeniti sve stare kontejnere i proširiti aktivnostima na buđenju svijesti ljudi o tome šta znači reciklaža, te napraviti kampanju kako se otpad odlaže. Mi ovo pokušavamo napraviti od kraja prošle godine, ali nailazili smo na probleme s podzemnim instalacijama i mjestima gdje se ovakvi kontejneri mogu postaviti jer zahtijevaju dosta prostora, a evo Općina Novo Sarajevo je prva općina koja je uspjela obezbijediti lokaciju i pribaviti potrebne saglasnosti, istakao je premijer Konaković.

Općinski načelnik Nedžad Koldžo istakao je da se navedeni projekat realiziran u skladu sa općinskim Planom upravljanja otpadom za 2016. godinu, te da će se ove aktivnosti nastaviti i u narednom periodu. "Nakon pribavljanja potrebnih saglasnosti, ove godine nastavljamo sa izgradnjom podzemnih kontejnera na još dvije lokacije na području općine Novo Sarajevo, tačnije u ulicama Džemala Bijedića do broja 55 i Grbavička kod broja 3, za koje su sredstva obezbjeđena u Budžetu općine za 2016. godinu", istakao je načelnik Koldžo.

Cilj realizacije ovog projekta je razvijanje ekološke svijesti građana i smanjivanje otpada na gradskim deponijama.

POTPISIVANJE UGOVORA IZMEĐU GRADA SARAJEVA I ITALIJANSKE FIRME LEITNER OZVANIČEN POČETAK IZGADNJE TREBEVIČKE ŽIČARE

Početak radova na izgradnji Trebevičke žičare ozvaničen je Ugovorom o izradi glavnog projekta, isporuci opreme, montaži i puštanju u pogon žičare, kojeg su danas u prostorijama Gradske uprave potpisali gradonačelnik Sarajeva Ivo Komšić i predstavnik italijanske firme Leitner, Dominic Bosio. „Ovo je važan događaj za grad Sarajevo. Žičaru će graditi italijanska firma Leitner, koja je na međunarodnom tenderu koji je Grad Sarajevo proveo



izabrana kao najpovoljniji ponuđač. Inače, Leitner je danas jedna od vodećih svjetskih firmi za projektovanje, proizvodnju i montažu žičara“, istaknuo je gradonačelnik Komšić na press konferenciji upriličenoj po potpisivanju Ugovora.

Dominic Bosio je istaknuo da je firmi Leitner čast što će Sarajevo biti jedan od referentnih gradova kojem će ponuditi svoju najmoderniju opremu.

Oficijelni predstavnik donatora g. Offermanna, Armin Rustanbegović, koji je također prisustvovao press konferenciji, izjavio je da su sa današnjim danom donatorska sredstva operativna te će se firmi Leitner izvršiti avansna uplata, kako bi radovi mogli odmah početi.

Sudionici današnje press konferencije su istaknuli da će Trebevička žičara predstavljati najmodernije postrojenje koje će Sarajevo dobiti. Činit će je 33 kabine, svaka sa po 10 mjesta, kapaciteta 1.200 putnika na sat. Umjesto nekadašnjih 12 minuta, novom žičarom će se stizati na Trebević za 7 minuta i 15 sekundi. Za razliku od stare, nova žičara neće stvarati buku, koristit će malo energije, ekološki će biti prihvatljiva.

Kabine su ustvari panoramske gondole, koje se mogu koristiti i danju i noću, ili u vidu konvoja za potrebe prigodnih manifestacija u gradu. Dogradonačelnik Skaka je najavio da će firma Leitner za sedam do deset dana isporučiti jednu gondolu koja će kao mini-instalacija biti izložena ispred gradske Vijećnice kako bi se građani Sarajeva mogli upoznati sa njenim izgledom.

UNIONINVEST ULAŽE 1,7 MILION KM U INDUSTRIJSKU ZONU BINJEŽEVO

U industrijskoj zoni Binježevo su 6. septembra/ rujna počeli radovi na izgradnji proizvodno-skladišnog objekta za proizvodnju opreme za tretman pitkih i otpadnih voda preduzeća Unioninvest d.d. Sarajevo. Gradilište su obišli predstavnici ove kompanije na čelu sa Farukom Gabelom te Općinski načelnik Hamdo Ejubović.



Grb Grada Sarajeva



Grb Općine Hadžići



"Gradimo proizvodno-skladišni objekat ukupne vrijednosti 1,7 miliona KM. Rok za završetak prve faze gradnje je 60 dana. Ovim proširujemo djelatnosti kompanije na proizvodnju opreme za tretman pitkih voda, prečištača otpadnih voda i industrijskih voda, cjevovoda, sistema za navodnjavanje, pumpne i hlorne stanice te paketna postrojenja za biološko pročišćavanje otpadnih voda. Industrijska zona Binježevo koja se nalazi na zapadnom ulazu u Sarajevo je odlična lokacija. Zahvaljujem se i Općinskoj administraciji na čelu sa načelnikom Ejubovićem koji su uradili sve

što je potrebno da krenemo u realizaciju naše ideje. Proizvodnja bi trebala početi negdje sredinom 2017. godine. Trenutno u ovoj oblasti imamo 30 uposlenih, a po završetku projekta zaposlit ćemo još 10 osoba", kazao je Gabela. Načelnik Ejubović kaže kako su projekti koji donose nova radna mjesta njihov prioritet. "Za investitore smo tu 24 sata u sedmici na raspolaganju. Trudimo se da što bolje uredimo naše industrijske zone kako bi privukli ulagače i ponudili im najbolje uslove. Naravno da sve to prati učinkovita općinska administracija", istakao je načelnik Ejubović.

KORISNI LINKOVI ZA PREDPRISTUPNE FONDVE EU:

www.southeast-europe.net
www.adriaticipacbc.org
www.interregadriatico.it
www.europa.ba
www.cbib-eu.org
www.cbc-bih-mne.org
www.srb-bih.org
www.cbc-cro-bih.net
www.programmed.eu
www.tacso.org
www.euroinfocentar.ba
www.balkanfund.org
www.eurelmed.com
www.eacea.ec.europa.eu

DONJI VAKUF DOBIJA ZAIBILAZNICU

JP Ceste Federacije BiH će, iz kreditnih sredstava namijenjenih za modernizaciju puteva, finansirati izgradnju zaobilaznice u Donjem Vakufu. Tim povodom, jučer je 2. septembra/ rujna Općine u tome gradu održan radni sastanak, na kojem je razgovarano o ovom značajnom projektu. "Angažirali smo projektante kako bismo poboljšali idejno rješenje, koje imamo. S njima, načelnikom Donjeg Vakufa i predstavnicima općinskih službi, obišli smo teren i definirali završne korake u kompletiranju dokumentacije za glavni projekt", kazao je izvršni direktor za tehničke poslove JP Ceste Federacije BiH Dedo Pjanić. Po



njegovim riječima, na adresu Općine Donji Vakuf već je upućen zahtjev za izdavanje urbanističke saglasnosti, nakon čega će uslijediti aktivnosti na dobijanju neophodnih građevinskih dozvola. "Naravno, kasnije ćemo uključiti nadzor i izvođače radova. Sve će se raditi u skladu s prostorno-planskom dokumentacijom u općini. Prva faza projekta startat će u 2017., za što smo osigurali sredstva od oko 1,5 miliona eura", naglasio je Pjanić. Nosilac aktivnosti u projektu je, ističe, JP Ceste Federacije BiH, dok će Vlada Federacije BiH sudjelovati u troškovima finansiranja rješavanja imovinsko-pravnih odnosa. Za načelnika Donjeg Vakufa Husu Sušića, izgradnja zaobilaznice je najznačajniji projekt u poslijeratnom periodu na području ove općine. "Riješit ćemo sadašnje probleme u saobraćaju, koje ćemo u potpunosti izbjeći kroz centar grada i time omogućiti nesmetano održavanje raznih manifestacija. Stvorit ćemo pretpostavke za ekonomski napredak lokalne zajednice i stavljanje u funkciju novih kapaciteta", naglasio je. Dužina zaobilaznice je oko tri i po kilometra a uključit će, između ostalog, rješenja za dva mosta i četiri nova raskršća. "Trasa zaobilaznice kreće iz pravca Travnik, i kod zgrade Pošte prelazi na drugu stranu Vrbasa. Desni krak ide ispred mosta "Alija Izetbegović" i prugom se spaja s putem Donji Vakuf-Jajce. Lijevo stranom Vrbasa, negdje kod Rudnika gipsa, drugi krak se spaja s komunikacijom Donji Vakuf-Bugojno", pojasnio je Sušić. Procijenjena ukupna vrijednost projekta izgradnje zaobilaznice u Donjem Vakufu je oko 3,5 miliona eura, a sav posao bi trebao biti završen u naredne četiri godine.



Grb Općine Donji Vakuf



Musala 5/1

71000 Sarajevo

Telefon: ++387 33 216 502, 209 024, 209 120

Fax: ++387 33 552 810, 216 502

E-mail: dino@sogfbih.ba

Pratite nas na:



Pratite Savez općina i gradova Federacije Bosne i Hercegovine na



Pratite Savez općina i gradova FBiH na



NAJAVA OBILJEŽAVANJA DANA OPĆINA I GRADOVA ZA MJESEC SEPTEMBAR/ RUJAN

08. septembar/rujan - Dan Općine Ravno i blagdan Male Gospe, zaštitnice župe.

08. septembar/rujan - Dan Općine Prozor-Rama i blagdan Male Gospe.

10. septembar/rujan - Dan Općine Banovići. Na ovaj dan 1995. godine oslobođena je cjelokupna teritorija općine Banovići.

14. septembar/rujan - Dan Općine Donji Vakuf. Tog dana 1995. godine oslobođen je Donji Vakuf.

15. septembar/rujan - Dan Općine Zavidovići. Ovaj datum proglašen je za Dan Općine Zavidovići zato što je u periodu od 10. do 15. septembra 1995. godine izvršeno oslobođenje cjelokupne teritorije Općine Zavidovići (područja Vozuća 10. septembra 1995. godine i Blizna 15. septembra 1995. godine).

15. septembar/rujan - Dan Općine Ključ. Taj dan se obilježava i kao Dan oslobođenja jer su na taj dan 1995. godine jedinice Armije BiH oslobodile Ključ.

17. septembar/rujan - Dan Općine Bosanska Krupa. Navedeni datum predstavlja dan konačnog oslobođenja Bosanske Krupe 1995. godine.

18. septembar/rujan - Dan Općine Lukavac. Značaj ovog datuma je u činjenici da je 1995. godine oslobođena cijela teritorija Općine Lukavac.

18. septembar/rujan - Dan Općine Goražde. Ovaj datum podsjeća na 18.10.1992. godine, kada su jedinice Armije BiH prvi put oslobodile Goražde od neposrednog okruženja neprijatelja, i zlatnim je slovima upisan u historiju Goražda. Ovaj dan se obilježava i kao Dan BPK-a Goražde.

18. septembar/rujan - Dan Općine Maglaj. Toga dana 1408. godine u Povelji ugarskog Kralja Sigismunda „Sub Castro Nostro Maglay“ – „Pod našom tvrđavom Maglaj“ prvi put se u pisanim tragovima spominje ime grada Maglaja.

18. septembar/rujan - Dan Općine Kupres. Spomen na dan kada se prvi put spominje Kupres.

27. septembar/rujan - Dan Općine Pale u FBiH. Tog dan 1992. godine oslobođena je Hrenovica, najveća mjesna zajednica na prostoru Općine Pale-Prača i oformljeni prvi upravni organi Općine. Taj dan se obilježava i kao Dan otpora za Općinu Pale-Prača.

28. septembar/rujan - Dan Općine Livno. Najstariji pisani dokument u kojem se spominje Livno je Povelja kneza Mutimira od 28.09.892. godine kojom se Crkva sv. Jurja daruje splitskom nadbiskupu Petru II, u kojoj se među potpisnicima u listi svjedoka na drugom mjestu nalazi i livanjski župan Želimir. Ovaj datum se danas obilježava kao Dan Općine Livno.

Poštovani čitaoci,

putem ovog biltena pružamo Vam mogućnost da se informišete o aktivnostima Saveza, o bitnim dešavanjima u općinama i gradovima, aktivnostima naših partnera, institucija vlasti, kao i o razmjeni najboljih iskustava i praksi.

Na ovaj način Vam, također pružamo informacije o održanim konferencijama, seminarima, radionicama, okruglim stolovima, javnim raspravama, o održanim sjednicama organa i tijela Saveza.

Ukoliko želite da se prijavite za primanje ovog biltena možete to učiniti tako što ćete poslati e-mail na: dino@sogfbih.ba

Molimo vas da informacije o našem biltenu prosljedite svim u vašoj i susjednim općinama i drugim zainteresiranim.

Ukoliko želite da objavite neke od vaših novosti, iskoristite bilten Saveza, koji je brz i efikasan način komuniciranja.

Sa zadovoljstvom očekujemo vaše komentare, sugestije i primjedbe.

